

V 3
932



W

Ch



Qk. 207. 10

Verlegung etlicher vnchristlicher Artikel

Vg
932

Qk. 207

III, 781

Welche die Widerteuffer
furgeben.



M. D. XXXVI

BIBLIOTHECA
PONICKAVIANA

UNIVERSITÄTS-BIBLIOTHEK
HALLE
(SALE)



M. 281

fol. 281

Handwritten text, likely a title or header, appearing as faint bleed-through from the reverse side of the page.



IVXXV D. M.



123

Verlegung etlicher vnd christlichen Artikel/wel- che die Widerteuffer furgeben.



Diese kurtze schrift
ist gestellet zu vnterricht vnd
erinnerung der einfeltigen / da-
mit sie sich deste vleissiger hü-
ten / vnd deste besser zu bewa-
ren wissenn / fur der graus-
men Teufflichen sect der Widerteuffer / Vnd
wiewol die gantze lere der Widerteuffer / vol
irthumb vnd blindheit ist / vnd sie selb vn-
gleich sind / also / das bey etlichen / als bey
dem mörderischen hauffen / so zu Münster inn
Westvalen gewesen / noch mehr vnd graus-
mer irthumb gefunden werden / so sind doch
hie allein namhaftig erzelet / etliche artikel /
welche die Widerteuffer fast alle zu gleich /
erstlich furgaben / vnd von welcher wegen et-
liche / newlich inn diesen landen / gestrafft
sind / Vñ nach dem ihre irthumb zum teil strei-
ten wider das geistlich wesen / das die seel al-
lein belanget / zum teil auch auffribur leren /
vnd zerstörung des leiblichen regiments / vnd
der weltlichen stend vnd ordnung / so sind hie
2 ij etliche

etliche artickei vom leiblichen regiment erstlich
erzelet / vnd ist solchs aus zweien vrsachen be-
dacht:

Die erste vrsach ist / das die einfeltigen
an diesen Artickein / welche leicht zu verstehen
vnd zu richten sein / klar sehen vnd lernen mü-
gen / das der Widerteuffer sect vnrecht / wider
Gott / vnd aus dem Teuffel ist.

Denn wie Christus spricht / das die fals-
schen Propheten / inn schaffskleidern vmb-
ziehen / vnd sind doch innwendig citel reissende
Wölffe / also auch die Wiederteuffer / betrie-
gen die einfeltigen / mit schein etlicher eygen-
ertichten wercke / nemlich / mit ertichter de-
mut vnd anderer heuchley / damit sie den
schalck decken / Aber den fromen vnd fürsich-
tigen Christen ist not / der Widerteuffer geyst /
vnd eigne erfunden lere / das ist / das fürne-
meste vnd besondere heupstück irer sect / zu er-
forschen / vnd die schaffs kleider auff decken /
vnd das Wölffische hertze kennen vnd mer-
cken lernen.

Nu ist die rechte vnd gewisse prob / all-
zeit / aller secten vnd geister / das man sehe /
ob sie öffentlich falsche vnd vnchristliche lere
furgeben / vnd ernstlich für nötig vnd gewis
treiben vnd verteidegen / Wo diese mackel ge-
mercket vnd gefunden wird / da sollenn die
Christen fürsichtig sein / vnd schewe haben /
vor solcher secten.

Also

Also leret Sanct Paulus die falschen ge-
ster kennen. 1. Timoth. 4. vnd spricht / Sie
werden speis vnd ehe verbieten / vnd aus sol-
chen iren wercken / newe gerechtigkeit vnd vol-
kommenheit machen / Der gleichen verbieten
die Widerteuffer alle weltliche regiment / vnd
gehorsam / eid vnd eigenthum der güter / vnd
zureissen die Ehe / welchs doch alles Gottes
ordnung seind / vnd geben für / das solche ire
ertichte wercke / das rechte hohe Christliche
wesen vnd heyligkeit sey / wie vor zeyten / die
schendlichen ketzer Manichey auch gehalten
haben / vnd gleich solches gespenst den leu-
ten / mit der seltzamen / wunderlichen heylig-
keit für die augen gemacht / wie zu vnsern zei-
ten die Widerteuffer.

Dieweil nu so viel furnemer artickel / vnd
hauptstück inn der Widerteuffer lehre / öffent-
lich / vnd nicht geringe irthumb sind / denn
daraus folget zerrütung aller regiment / vnd
dazu geistliche blindheit / so ist nicht zweyuel /
gedachte Widerteuffer sect ist vnrecht / vnd
eitel verführung / durch den Teuffel erregt.

Darumb sollen die einfeltigen diese gro-
be Artickel ansehen / vnd betrachten / vnd ge-
dencken / das solche grobe irthumb / iederman
zu eyner warnung fürgestellet sind / das man
sich wisse für der Widerteuffer sect / deste mehr
zu scheuen vnd zu hüten / vnd alzeit das geist-
lich

lich ange auffthun / vnd nicht achten / die falsche demut vnd andere heuchley / sondern den schandflecken / vnd die Teuffelische giff / darunter verborgen / mercken / vnd dagegen klar Gottes wort halten / Also kan man sich fur des Teuffels listen bewaren.

Denn so man den lügenhafftigen geist / inn etlichen klaren vnd greifflichen artickeln / gemerckt vnd gespürt hat / so weis man / das man yn andern artickeln / danon die einfeltigen weniger verstehen / nicht dem lügenhafftigen geist glauben sol / sondern aus Gottes wort / guten beständigen bericht / gewarten vnd lernen.

Diss ist die eine vrsach / darumb erstlich diese artickel vom weltlichen Regiment / erzelt sind / Die ander vrsach ist / das meniglich daraus verstehenn möge / das die Oberkeit schuldig ist / mit ernster straff / der Widerteuffer sect zu weren / Denn das ist offentlich vnd gantz gewis / das die Oberkeit schuldig ist / auffruhr zu weren / weltlichen billichen gehorsam vnd eydpflicht zu erhalten / den Ebestandt zu schützen vnd zu handhaben / Nun streit darwidder das heupstück inn der Widerteuffer sect / wie ihre artikel klar beweisen / Darumb ist on zweinel die Oberkeit schuldig / solche schendliche / mörderische lere zu weren vnd zu straffen.

Denn

Denn welche zerrüttung würde folgen /
so diese irthumb vber hand nemen / nemlich
das Christen kein andere Oberkeit haben sol-
len / denn allein die diener des Euangelij /
Item / das man der Oberkeit keinen eid schwe-
ren sol / Item / das niemand sol eigentgumb
haben / sondern alle güter sollen inn gemein
geben werden / gleich als solt man fact man
inn allen Steten vnd Regimenten machen /
Item / das Eheleut mögen allein von wegen
der vngleichheit im glauben von einander ge-
hen / wie wir denn auch etlich befunden ha-
ben / die ihr weib vnd kind / vngedrungen / vnd
ohne alle vrsach verlassen haben / vnd aus die-
ser schendlichen lere / andere weiber zu sich ge-
nommen / Das ist ia leicht zuuerstehen / das
diese erzelte artickel eitel auffribur / raub vnd
mord / darzu vnzucht vnd Ehebruch leren vnd
pflantzen / Dagegen ist kein zweifel / das hie-
rinn der Oberkeit gebür / ernstliche straff fur
zunemen / aus gehorsam / den sie Gott schul-
dig ist / Gott zu lobe / vnd den vnderthanen
zu gut an leib vnd seel.

Vnd ob gleich etliche arme leute / wel-
che sonst nicht mutwillig vnd freuel sind / inn
diese irthumb fallen / ist doch not / der secten
vnd dem samen zu weren / Vnd sol die Ober-
keit nicht leiden / das solch giffüg geschmeis /
weiter ausgebreitet werde.

So beweiset auch das schreckliche Ex-
empel

empel zu Münster / das der Widerteuffer de-
mut / vnd gedult eitel Teuffliche heuchelei
ist / Den zu Münster war auch der anfang
eitel grose heyligkeit / Vnd lereten / Ein Christ
solte das schwerd nicht führen / solt alles ley-
den / wolten auch erstlich keine Oberkeyt / son-
dern alleyn Propheten vnd Prediger haben /
Darnach verriagten sie ihre burger / vnd namen
in die güter / als die Reuber / vnd machten ein
König / vnd hatten für / das Land herum
mit dem schwerd vnter sich zubringen / als
mörder / Dazu trieben sie allerley vnzucht / Als
so brach ihr geist heraus / da er meinet rhaum
zu haben / vnd gieng / wie man pflegt zu sa-
gen / Der Teuffel kan sich sonst gar verstel-
len vnd schon machen / allein die füß kan er
nicht bergen / das ist / Entlich vnd im aus-
gang / Kennet man des Teuffels verführung /
Aber Christen sollen fürsichtig sein / vnd die li-
ste vnd der verführung warnemen / ehe sie gefan-
gen werden / Wie man nu zu Münster hat
müssen weren vnd straffen / nach dem die Wi-
derteuffer öffentlich den Raub vnd Mord / mit
der that getrieben haben / also ist die Oberkeit
schuldig / denen / so der gleichen auffhür-
sche Artickel halten vnd ausbreiten / vnd nicht
dauon abstehen wollen / zu wehren vnd sie zu
straffen / als den ienigen / so das schwerd ge-
zückt haben / ob es gleich noch zum streich
nicht komen ist. Das sey gnug dauon / wa-
rumb bedacht ist / die Artickel vom leyblichen
Regiment / erstlich zu erzelen.

Es

Es sollen auch alle Christen bey diesen
Artickeln betrachten / das des Teuffels macht
schrecklich vnd gross ist / das er inn solchen
groben Artickeln / menschliche hertzen vnd ver-
nunfft / so hart verblenden kan / das die aller
gröbsten sünd vnd schand / als auffrur / raub /
vñ ehebruch / sol fur die höchst heiligkeit geach-
tet werden / Das ist ia krefftiger irthumb /
welchen die welt mit ihrer grausamen sicher-
heit / vnd verachtung des heiligen Göttlichen
worts verdienet / wie Sanct Paulus spricht /
vnd der welt / von wegen solcher verachtung
drawet / Dieser zorn vnd diese straff / ist alle
zeit inn der welt gar schrecklich gangen / vnd
wird zu diesen letzten zeiten viel grösser sein /
den der drutz vnd verachtung Gottes / Freuel
vñnd furwitz wird grösser / darumb müssen
grausam straffen folgen / Derhalbē sollen wir
dieses schrecklich Exempel der Widerteuffer
ansehen / vnd diese / vnd der gleichen straff
fürchten / vnd vns bessern / vnd mit rechtem
ernst Gottes wort lernen vnd lieben / vnd inn
Gottes forcht bitten / das er vns nicht wölle
inn versuchung fallen lassen.

Es sollen sich auch die fromen trösten /
vnd bedencen / das rechter glaube müsse an-
fechtung haben / Darumb sollen sie gerüst sein
mit Gottes wort / wider alle ergernis / Vñ wie
wol anfechtung inn der Christenheit zu allen
zeiten inn dieser welt bleibet / so ist doch zu hof-
fen durch

fen durch Gottes gnade / das dieses gift der
Widerteußer / nicht lang bleiben wird / son-
dern wird bald widerumb verschwinden / denn
der Widerteußer sect / ist nicht vngleich den
Manicheis / vnd sihet / als sey eben der Teuf-
fel der Widerteußer meister / der vorzeiten die
Manicheos erregt hat / welche auch solche
falsche heiligkeit furgaben / mit verachtung
aller weltlichen Regiment vnd Stende / vnd
wolten kein schrift vnd lahr haben / sondern
wolten allein halten / was sie der geist leret /
gleich wie itzund die Widerteußer reden / ver-
dampten auch den Ebestand / vnd trieben da-
neben grosse schandliche vnzucht / Wie nu die
selbige zeit die Manichei / wiewol es ein gros
geschmeis war / dennoch nach etlichen iarn
vnter gangen / vnd gantz verlofchen sind / Also
ob gleich der Widerteußer wüten ein schreck-
lich ansehen hat / wird es doch / als durch
Gottes gnad zu hoffen / nicht mechtiger wer-
den / vnd nicht lang bleiben. Nu wollen wir
von bemelten artikeln reden / Aber zum ein-
gang ist not diese stück hie zu mercken / vnd
wol zu betrachten / daraus man auch der Wi-
derteußer geist richten kan / nemlich / das die
Widerteußer an dem furnemisten stück Christ-
licher lahr feilen / Denn das sol furnemlich
inn Christlicher lahr / geprediget vnd getriben
werden / das Christlich gerechtigkeit vnd heil-
igkeit / sol im hertzen sein / rechter glaube vnd
vertrauen auff Christum / ernstliche Gottes
forcht

forcht vnd liebe / vnd sollen eusserlich leibliche
Regiment vnd stende von Gott geordnet / für
Gottes gebot / vnd gute werck gehalten wer=
den / darein Gott vnser leiblich leben gefasset
habe / das wir darin den glauben gegen Gott
vben / vnd ander gute Exempel fürtragen /
Auch was wir alle ein ander dienen / lieb erzei=
gen vnd beweisen / Dis sind die rechten hohen
Gottes dienst / dauon vns das heilig Euan=
gelium prediget.

Aber menschlich hertz bleibet nicht gern
bey diesen Gottes diensten / vnd bey Gottes
wort / sondern sucht allezeit ander wege / vnd
sonderlich sperret man die augen weit auff /
wenn man nicht gewonliche werck / sondern
etwas neues vnd besonders ertichtet hat /
Diese heiligkeit thut menschlichem hertzen so
sanfft / vnd wird so hoch gehalten / das auch
im alten gesetz / die leut aus dieser falschen
lust / hoffart vnd wolgefallen / in eigen ertich=
ten wercken / ire kinder opfferten vnd tödten /
Darumb ist nicht wunder das itzund die Wi=
derteuffer vnd ihr gleichen / ire werck so hoch
achten vnd lieben / das sie sich mit grosser Eün=
heit inn tod geben / Denn Also keren sie auch
die lahr gantz vmb / sie wissen nichts von der
heiligkeit im hertzen / vnd richten an / ein euf=
serliche neue heiligkeit / nemlich / zerstörung
guter ordnung vnd sitten / der Regiment / des
Eides / des Eigenthums vnd Ebestandes /
Diese zerstörung vnd barbarey / sehen sie an /

B ij für hohe

fur hohe k̄stliche werck / nicht darumb das
es etwas fremdes vñ vngewonlichs ist / son-
dern viel mehr darumb / das der Teuffel /
welcher sie besessen hat / lust daran hat / die
leut von Gottes wort vnd ordnung / auff ein
andere strassen abzufuiren / vnd damit Abgöt-
terey vnd allerley sünd anzurichten.

Dieraus ist wol zuuerstehen / aus wel-
chem grund der Widerteußer irthumb vom
leiblichen Regiment herkömpt / nemlich / das
sie des heuptstückes inn Christlicher lere feilen /
vnd wissen nicht / was Christlich gerechtig-
keit ist / vnd meinen / es sey nur solche eusser-
liche vngewonliche weise / Dazu ist wol zu
verstehen / das diese irthumb / vom leiblichen
Regiment nicht allein eusserlich schaden thun
auffrühr vnd zerstörung anrichten / welche
doch billich mit grossen ernst sollen verhütet
werden / sondern thun auch schaden im geist-
lichen wesen / denn zu dem / das mord vnd der
gleichen sünden daraus folgen / vertunckeln sie
auch den rechten verstand von Christlicher ge-
rechtigkeit / vnd weisen die leute von Christo /
vnd vom glauben / auff newe tolle werck /
welche doch inn warheit eitel vnordnung / ver-
wüstung / schand vnd laster sind.

Schrecklich ist zu hören / das mensch-
liche hertzen so seer verblendet werden / Denn
die Widerteußer haben noch nicht hoher
oder

oder anders erdacht / denn dieses / Man sol die
Kinder nicht teuffen / vnd sol kein Oberkeit /
kein Regiment haben / kein eids pflicht thun /
nicht eigens behalten / vnd weiber nemen irer
sect anhengig. Nu bedencke doch ein ieder ver=
nünfftiger diese stück selbs / welche heiligkeit
kan dieses sein / Es ist ia öffentlich / das solchs
nicht anders ist / denn ein grausame verwu=
stung / Die kirche wollen sie zerreißen mit ver=
bietung der Tauff / Die andern artikel sind ein
zerstörung des leiblichen lebens / aller zucht
vnd guten ordnung / die doch auch Gottes
gebot vñ werck sind. Nu haben ia die Wider=
teuffer kein andere heiligkeit / darumb sie sich
von vns absondern / denn bemelte schöne ar=
tikel / Was können sie denn vor heiligkeit rüh=
men? Warumb solte sich ein Christ vor ihnen
entsetzen? Ja ein Christ sol mercken / das der
Widerteußer sect / eitel Teuffelischer betrug
ist / Darumb sol er mütig sein im glauben / vñ
den Teuffel getrost verachten / vnd im wider=
stand thun / ein ieder nach seinem beruff vnd
ampt.

Das sey hie genug / zu einer gemeinen
erinnerung / auff die folgenden artikel / das die
einfeltigen deste vleissiger betrachten / warinn
ein Christlich wesen eygentlich stehet / vnd se=
hen / das die Widerteußer des rechten zils
weit felen. Nu wollen wir die artikel nach ein=
ander erzelen / vnd mit gutem grund verlegen.

B ij Der

Der erst artikel der Wi- derteuffer. .

Das Christen sollen vnd können nicht
in Oberkeit vnd ampt sein / welches das
schwert füret.

Das dieser artikel vnrecht vnd vnchrist-
lich sey / beweisen erstlich die Exempel inn der
heiligen schrift / inn welchen zu sehen / das
viel heiliger leute / Könige / Fürsten vnd ampt-
leut gewesen sind / vnd das schwert nach irem
stand vnd ampt gefüret / Christus lobet den
Deutman / Matthei am 8. vnd preiset seinen
glauben so hoch / das er sprach / er hette nicht
solchen glauben inn Israel gefunden / Dieser
Deutman war ein Römischer Krieger / wie
er selb anzeiget / vnd wird dennoch von Chri-
sto gepreiset / als ein grosser heilig vnd Gottes
Kind. Dergleichen wird der Deutman ge-
lobet / im buch von der Apostel geschicht / zu
welchem Sanct Peter gesand wird. So sind
Abraham / Joseph / David / Ezechias / Da-
niel / vnd viel andere heilige Christliche leut
gewesen / vnd haben gleichwol das schwert
gefüret / Item / inn Psalmen stehet von Chri-
sto / Könige werden ihn anbeten. Daraus ist
klar / das auch etliche Könige vnd Fürsten /
Christen sein werden.

Zum

Zum andern Luce 3. Da die Krieger vnd
amptleut / Johannem den Teuffler fragten /
was sie thun sollen / Antwort er / sie sollen sich
mit ihrem solt benügen lassen / vnd niemands
gewalt odder vnrecht thun / Damit ist das
ampt bestetiget vnd gelobet / Dieweil er sie
im solt bleyben leßt / vnd spricht / sie sollen ihre
solde haben / Den der solde gehört zum ampt.

an der vnser Krieger
da beynd

Zum dritten / der Widerteuffer gründli-
che meinung ist diese / das die ordenlich straf-
fe im Regiment / eitel sünd vnd tyranny sey /
denn die rach sey den Christen verboten / wie
geschriben stehet Rom. 12. Ihr solt euch
nicht rechen / etc. Dieses ist der Widerteuffer
grund / Vnd solcher missverstand / gibet inen
ursach / das sie ihr gedult fur grosse heyligk it
rhümen / vnd dazu verdammnen alle Oberkeit /
Denn sie meinen / es müssen alle Christen wer-
cke durchaus gleich sein. Das ist eitel blind-
heit / vnd kommt aus vnrechter deutung der
schriff / vnd aus dem missverstand / das sie
nicht vnterscheid wissen / zwischen dem geistli-
chen wesen im hertzen / vnd den eusserlichen
stenden / welche sollen vnd müssen vngleiche
werck haben / wie der man vnd das weib / vat-
ter vnd kind / eusserlich vngleiche werck haben
vnd sol doch im hertzen einerley Gottes
forcht / vnd glauben an Christum sein.

Darumb / so die Widerteuffer die sprüch
anziehen /

anziehen / darinn die rach verboten wird / sol
man wissen darauff also zu antworten / nem-
lich / das alle rach / auffer dem ampt verbo-
en ist / Aber die rach im ampt / ist Gottes gepot /
vnd ein heilig gut werck / Diesen vnterschied
leret vns die heilig geschriffte selb / vnd ist nicht
von menschen erticht.

Denn Paulus spricht von dem ampt /
welches das schwerd füret / das es Gottes
werck vnd ordnung sey / vnd das die Oberkeit
Gottes dienerin sey / zur rach vnd straff der
bösen / vnd zum schutz der fromen / Aus dies-
sen sprüchen ist klar / das diese rach im ampt /
nicht sünd ist / sondern Gottes gebot vnd ord-
nung / vnd ein rechter heiliger Gottes dienst /
Vnd dieweil das ampt nicht sünd ist / sondern
ein gut werck von Gott geordnet / so mögen
die Christen solch ampt haben vnd gebrau-
chen / wie andere Gottes gaben / als speis vnd
trancck et.:

Ja sie müssen dieses ampt erhalten vnd
nicht zerstören / denn das gesetz mus inn der
welt bleyben / zur straff der bösen / wie Paulus
spricht / Das gesetz ist vmb der vngerechten
willen / Nu ist das ampt / welches das
schwerd füret / ein stück des gesetztes.

Zum vierden / Gott gebeut inn der hei-
ligen schriffte / man sol die Wittfrawen vnd
Waisen schützen / Dieses wird in der Christ-
lichen

lichen Oberkeit geprediget vnd gepoten / Dar-
umb ist die straff Gottes gebot / Vñ ist Christ-
liche Oberkeit schuldig / straff vnd rach / gegen
den bösen zu vben.

Aus diesem allem ist klar / das die sprüch
so die rach verbieten / reden von den wercken /
auffer dem ampt / Die andern sprüch / welche
die Rach preisen vnd gebieten / reden von wer-
cken im ampt / Vnd ist leicht zuuerstehen / wa-
rumb die werck im ampt vnd auffer dem ampt
vngleich sein müssen / denn solches ist not zu
erhaltung des fridens vnd der zucht / Denn
wylche vnordnung vnd auffrühr wurde fol-
ge / so ein ieder vnterthan selb straffen / vnd
selbs Richter sein wolt / Darumb hat Gott
das Regiment wol vnd nutzlich geordnet.

Der ander Artikel.

Christen sollen keine andere Oberkeit
haben / denn allein die diener des Euangelij.

Inn diesem Artikel ist noch klerer zu se-
hen / aus welchem geist / der Widerteuffer sect
sey / denn zuuor / Denn hie wird zu gleich die
Oberkeit verdampt / vnd der gehorsam zer-
rissen / Vnd dieweil dieser Artikel leicht zu ver-
legen ist / bedarffs hie nicht viel wort / Allein
sind die einfeltigen zu vermanen / das sie vleis-
sig betrachten wollen / wie schrecklich dieser
C artikel

artikel ist / Vnd das dieser artikel der Wider-
teuffer auch falsch sey / beweiset Paulus Ro-
ma. 13. da er spricht / Es ist nöttig vnterthan
sein / nicht allein von wegen der straff / son-
dern auch vmb des gewissens willen / Dieser
spruch leret / das Gott für sünd halten / vnd
ernstlich straffen wird / so iemand nicht wil vn-
derthan sein / In bindet dieser spruch alle men-
schen auff erden / vnd steht in niemands ge-
walt / sich danon auszuziehen / Darumb
müssen alle Christen / weltliche Oberkeit vnd
regiment haben.

Zum andern ist öffentlich / das Gott
diese zwey ampt vnterschiedlich geordnet hat /
das predigampt vnd weltliche Oberkeit / vnd
hat befohlen / das die Christen vnter beiden
emptern sein sollen / Darumb ist ein grewli-
cher irthumb diese empter inn einander men-
gen / oder das eine auffheben vnd weg nemen /
so sie doch beide Gottes ordnung vnd befehl
sind / Denn es hat ia kein mensch macht /
Gottes ordnung vmb zu stossen.

Das aber die Widerteuffer dagegen
sprechenn / die fromen bedürffen der straff
nichts / darumb bedürffen sie auch der Ober-
keit vnd weltlichen Regiment nicht / ist citel
blintheit / Denn die frommen bedürffen der
Oberkeit zum schutz / Item / die Oberkeit be-
darff der gehorsamen vnd fromen Christen zu
erhaltung der Regiment / Darumb wil vns
Gott

Gott vnter dieser ordnung haben / vmb beyder
vrsach willen / nemlich / das wir schutz ha-
ben / vnd dagegen das wir dienen mit leib vnd
gut / inn allem gehorsam vnd aller trew / vnd
zu aller zeit inn kriegs nöten vnd sonst / heiffen
ieder nach seinem beruff / die Regiment / friden
vnd zucht zu erhalten / vnd den bösen zu we-
ren / Zu diesem dienst gehören furnemlich die
fromen Christen / Das alles leret Paulus
Rom. 13. da er spricht / Wir sind der Oberkeit
gehorsam / schos vnd ehr etc. schuldig / Wer
nu dagegen leret / das Christen keine Oberkeit
haben mögen / der leret / das man der Ober-
keit ihr gerechtigkeit / die sie hat an vnsern ge-
horsam / enziehen möge / das ist öffentlich wi-
der Paulum.

Der dritte Artikel.

Christen sey verboten Eid schweren /
vnd Eid schweren sey sünd.

Dieser artickel ist auch ein zerstörung
weltlicher Regiment vnd gericht / Denn re-
giment vnd gericht / sind mit dem Eid gefas-
set. Das aber die Christen mügen Eid schwe-
ren / beweisen erstlich die Exempel / Denn S.
Paulus schwerd selbs ein Eid mit klaren wor-
ten. 2. Corinth. 1. Ich neme Gott zum zeugen /
vber meine seele. Also schweret Sanct Paulus

C ij offt

offt / als Rom. i. Philippenſes. i. Gott iſt mein
zeuge / Vnd an andern mehr örten.

1. Cor. 6. In allen ſachen / inn gericht
ten / iſt der Eid das end vnd beſtetigung / Die
wird der Eid inn den gerichtten gepreiset / vnd
für nötig angezogen / Daraus folget / das
nicht vnrecht iſt Eid ſchweren / denn bey den
Chriſten müſſen auch gericht vnd Richter
bleiben / wie droben vom Regiment vnd Ober
keit geſagt iſt / Denn gericht ſind ein fürne
mes ſtück der Regiment / vnd des ampts der
Oberkeit.

Deutro. 5. Du ſolt bey dem namen des
Herrn ſchweren / Die wird im andern gebot
befohlen / das man ſol ſchweren / doch allein
bey Gottes namen / So nu geboten iſt zu
ſchweren / wo ſolchs gefordert wird / mus
folgen / das ſchweren nicht ſünd iſt / ſondern
ein gut heilig werck / dadurch Gott geehret
wird / ſo man recht vnd mit warheit ſchwe
ret / vnd ſolchs nicht aus leichtfertigkeit thut /
ſondern dieweil es Gottes ehr / vnd die Ober
keit fordert.

Das aber die Widerteuffer dagegen an
zihen Matthei. 5. Du ſolt nicht ſchweren / bey
dem tempel etc. iſt erſtlich dieſes zu antwor
ten / das hie der Eid nicht verboten iſt / ſondern
dieſes iſt verboten / das man die ehr / ſo Gott
gebüret / nicht den creaturn geben ſolle / Gott
iſt allein der Herr / der die hertzen kenne / vnd
vnwarheit

vnwarheit straffet / Darumb sol Gottes nammen angezogen werden / vnd nicht der Tempel oder anders.

Zum andern ist zu antworten / da Christus spricht / Ewer rede sol sein / ia / ia etc. spricht er / Ewer rede / damit zeiget er an / das er den Eid verbeut inn vnsern eigen vnd priuat reden / nemlich / so vns der Richter oder die Oberkeit den eid nicht auff leget / Item / so nicht Gottes ehr vnd ander leute seligkeit / vnseres Eides bedarff / Dagegen ist recht vnd nötig zu schweren / so es die Oberkeit oder der richter fordert / wie gesagt ist / Ebreos. 6. Der Eid ist inn gerichtten / das end / vnd bestatigung etc.

Der vierde artikel.

Christen sind schuldig ihre güter inn gemein zu geben / vnd sollen nicht eigenthumb haben.

Dieser artikel locket dem losen hauffen / der nicht gern erbeit / vnd mehr verbrasse denn er weis ehrlich zu erwerben / Das aber solche lere eitel reuberey vnd auffrhur anrichtet / Kan leichtlich ein ieder verstehen / Doch die einfeltigen zu verwarnen vnd zu vnterrichten / wollen wir aus Gottes wort vnd gebot kurtzlich beweisen / das die Christen mügen eigenthumb

C ij thumb

thumb haben / Vnd das auffhur / vnd wider
Gott ist / gebieten / die güter inn gemein zu ge-
ben.

Zum ersten / Dieser verstand ist den Chri-
sten hoch von nöten / das sie wissen / das euf-
ferlich weltlich Regiment / Gottes ordnung
sey / Vnd das Gott gefellig ist / das wir darinn
leben / vnd einander dienen / wie zunor ange-
zeigt ist / Nu ist eigenthumb haben der furne-
mesten vnd nötigsten stück eines im Regiment /
Daraus mus folgen / das ein Christ / solche
ordnung gebrauchen vnd halten müge / ia
wer diese ordnung auffheben vnd verbieten
wil / vnd dagegen ein new Regiment machen /
vnd gebieten die güter auff ein gemeinen hauf-
fen zu werffen / der vnderstehet sich Gottes
ordnung zu reissen / vnd thut wider Gott.

Zum andern / Paulus leret 1. Corinth. 7.
Das die Christen keuffen vnd verkeuffen mü-
gen / darumb mügen sie eigenthumb vnd gü-
ter haben / vnd zu Timotheo schreibt er / Ge-
biet den reichen / das sie gern almosen geben /
spricht nicht / das sie von gütern gehen sollen /
sondern lesset sie inn ihren gütern / vnd reich-
thumb bleiben.

Zum dritten / Könige vnd Fürsten / müs-
sen güter vnd eigenthumb haben / Nu leret die
schriffte klar / das etliche König vnd Fürsten ier-
lig werden.

Zum

Zum vierden / Proverbiorum 3. Deine
bronnen sollen hinaus fließen / aber du solt
herr darvber bleibē / Da leret die heilig schriffe
das ein ieder sol herr vber sein erbgut bleiben /
Aber von den fruchten vñ nutzungen sol man
andern auch helffen / das meint er / da er
spricht / Die brünlin sollen hinaus fließen / Vñ
ist warlich ein vernünfftigen Gottsfürchtiz-
gen Christen ein trost / so er weis / das Gott
diese weltliche ordnung wolgefelt / das man
inn gütern sitzet / vnd narung sucht / vnd das
Gott derhalben seine ordnung zu schutzen /
zur narung helffen wil / etc. Das aber die Wi-
derteuffer dagegen anziehen der Apostel Exem-
pel / da die Christen zu Jerusalem ihre güter
inn Gemein geben haben / dieses ist nicht ein
gebot / Denn es sind auch die zeit / viel Chri-
sten gewesen / die solche weis nicht gehalten
haben / sondern sind inn ihren gütern sitzent
blieben / wie man beweisen mag aus Paulo /
2. Corinth. 9. Da auch Paulus leret / das
man niemand von seinen gütern dringen sol /
söndern das almosen geben / stehen sol / bey
eins ieden guten willen. Die weil aber zu
Jerusalem ein grosse verfolgung war / vnd
teglich den Christen die güter genomen /
vnd sie veriaget worden / war inen nützlich-
cher / das sie die güter selbs verkaufften / vnd
das gelt zur nottufft zu behalten / zu sas-
men legten / Also haben sie dises von wegen
der verfolgung gethan / vnd nicht / das solch
wercke

wercke eine newe heiligkeit were / wie etliche
Mönche / Widerteußer / vnd andere tolle hei-
ligen / solche vngewerde vnd zerrüttung natür-
licher ordnung vnd Regiment / für köstlich /
himlisch wesen ansehen / vnd verstehen nicht
das Christlich heiligkeit / im hertzen sein mus /
vnd das Gott wol gefelt / das wir vns im auß-
serlichen leben / nach gewonlichen vnd or-
denlichen Regimenten halten.

Der funfft artikel.

So im Ehestand die ein person recht
glaubig ist / vnd die ander Eheliche person /
nicht recht glaubig / so sey solcher Ehestand
hurerey / vnd müge die recht glaubige person /
die ander verlassen / allein des glaubens hal-
ben / vnd ein andere freien.

Dieser artickel / sol billich vernünfftige
vnd züchtige leute bewegen / das sie der Wi-
derteußer sect ernstlich vnd von hertzen feind
werden / Denn es ist schrecklich zu hören / das
sie rechten Ehestand schenden vnd zerreißen.

Das aber dieser artickel der Widerteußer
vnrecht sey / ist gantz klar aus Paulo 1. Corin. 7
da Paulus eigentlich diese frage handelt /
Ob die glaubigen vnd vnglaubigen im Ehe-
stand bey einander bleiben solten / Vnd be-
schleußt

schleust / das sie sollen beieinander bleyben /
Vñ leret dabey / das solche Ehe / dem gleubigen
ein rechte / heilige / vnd Gott gefellige
Ehe sey / Darumb spricht er / Die vngleubige
person wird geheiligt / durch die gleubige /
das ist / die Eheliche beywohnung dieser per-
son / wird heilig / das ist / Gott gefellig / vnd
ist nicht sünd Denn also sol man das wort /
heilig / an diesem ort verstehen / wie Paulus
sonst auch spricht / Die speis wird geheiligt /
das ist / Es ist nicht sünd / die speis gebrauchen /
die Gott geschaffen hat.

Also leret Sanct Paul beide stück / nemlich /
das erste / das die gleubige person bey der
vngleubigen bleiben sol / vnd zu bleiben schuldig
ist / wo sie nicht von der vngleubigen / mit
willig verlassen wird / Das ander / das zwisch
en der rechtgleubigen person / vñ der vngleubigen
ein rechte Ehe ist / Also das die rechtgleubigen
person mit gutem gewissen in solcher Ehe /
als inn einem Gott gefelligem heiligen stand
sein kan / vnd darin zu bleyben schuldig ist /
Denn Sanct Paul spricht deutlich / das diese
beywohnung heilig sey / Darumb ist es eitel
Teuffel spiel / das die Widerteuffer solche Ehe
hurerey scheiden / vnd zerreißen.

Vnd wiewol die Widerteuffer gantz vn-
verschampt sind / vnd ertichten lügen vnd glos-
sen wie sie wollen / so kan doch ein ieder vernünftiger

D

nünftiger

nünfftiger leichtlich verstehen / das dieses / wie
wir gesagt haben / grüntlich vnd eigentlich S.
Paulus meinung ist / Dagegen haben ihn die
Widerteuffer ein eigen sprichwort erdicht /
Ein glaub / ein liebe / Das deuten sie also / sie
seien den ienigen / so nicht ires glaubens sind /
nicht schuldig das Ehegelüb zu halten /
Wenn dieses sprichwort also zu deuten were /
das man niemand trewe zu halten / oder lieb
zu erzeigen schuldig sein solt / der vns im glau-
ben vngleich ist / so kont man leichtlich alle
hendel / verpflichtungen / vñ schuld ausleschē /
Christus hat geboten / wir sollen auch vnser
feind lieb haben / welche vns verfolgen / vnd
offentlich im glauben vngleich sein / Wieviel
mehr sollen Eheleut einander trewe sein / etc.

Das wer besser gedent / das ein ieder
inn seinem eigen hertzen / ein glauben / vnd ein
lieb / haben sol gegen Gott / das ist / das er al-
lein an Gott glauben / sein vertrauen allein zu
Gott haben / Gott allein vber alle ding lieben
sol / vnd sich nicht von Gott abwenden lassen
durch wollust / ehr / gelt oder gut / etc. Die sel-
bige lieb zu Gott / bringet auch mit sich den ge-
horsam inn allen wercken / die Gott zu iedem
stand geboten hat.

Die

Von der Kinder tauff.

Die Widerteuffer halten / das die Kinder
tauff vnrecht sey.

Nu bedenck hie ein ieder Gotforchtiger
mensch zum ersten / wie schrecklich ist / ein gros
sen teil des menschlichen geschlechts / nicht al
lein inn ein vngewissen standt auffer der Christ
lichen kirchen werffen / sondern von Gottes
ordnung vnd gnaden zur verdammnis reissen.
Zum andern / Welche zerrüttung wolte folge
so nu vnter vns selb zween hauffen / ein ge
tauffter vnd vngetauffter auffwachsen solten /
Vnd so die tauff zum grössern teil abgethan
were / wurde darnach öffentlich Heidnisch
wesen einreissen / Dazu wolte im der Teuffel
gern ein wege machen. Darumb sollen alle
fromen Christen wol vnterricht sein / von der
Kinder tauff / vnd sich selb mit gutem grund
wissen zu trösten vnd zu starcken / das sie die
Kinder tauff treulich erhalten / Gott zu ehr /
den lieben kindern zur seligkeit / vnd vns selb
zum trost / Denn es ist fromen Christen gantz
tröstlich / wenn sie gnugsam vnterricht sind /
das die Kinder gewislich durch die tauff / Got
tes Kinder / vnd selig werden / Darumb wollen
wir beweisen / das die Kinder tauff recht vnd
nöttig sey / vnd ist dieses der erst grund.

D ij Das

Das ist gewis vnd vnlaugbar / das die
gnad Christi / vergebung der sünd vnd selig=
keit / im Euangelio verheissen / auch den kin=
dern gehört / wie den Christus spricht / Lasset
die Kinder zu mir komen / solcher ist das himel=
reich.

Nu ist auffer der Christlichen Kirchen /
das ist / wo nicht Sacrament vnd Gottes
wort ist / kein seligkeit / Darumb müssen die
Kinder der Christlichen Kirchen eingeleibet vnd
der selbigen glieder werden / vnd mus in durch
das Sacrament solche gnad gereicht werden /
Denn Gott hat das enfferlich ampt also ge=
ordnet vnd beuolhen / das dadurch sol ver=
gebung der sünden / allen / inn der Kirchen aus=
geteilet werden / Das alles ist öffentlich vnd
gewis / Denn die Widerteuffer können nimer
mehr beweisen / das seligkeit sey auffer der
Christlichen Kirchen / das ist / wo nicht Sacra=
ment vnd Gottes wort ist.

Der ander grund / Die Kinder sollen vnd
müssen glieder der Christlichen Kirchen sein /
sollen sie anders selig werden / wie itzund ge=
sagt ist / Nu leret Sanct Paulus / das Christ=
lich Kirch / sey die versamlung so durch den hei=
ligen geist vnd tauff gereiniget ist / Darumb
kan niemand on tauff / ia mit verachtung der
tauff / ein glied der Christlichen Kirchen sein /
Also leret auch Christus Johan. 3. Niemand
kan eingehen inn das himelreich / er werde den
wider

widergeboren durch das wasser vnd den heiligen geist / Die fasset ia Christus alle menschen auff erden / iung vnd alt / vnd saget nemlich vom wasser / Darumb so die widerteuffer fragen / wo geboten sey / die kinder zu tauffen / sollen wir vns an den spruch halten / vnd wissen / das do geboten ist / Denn Christus spricht / Niemand kan inn das himelreich komen / er werde denn wider geporn / durch das wasser vnd heiligen geist / Denn das ampt / mit dem wassertauffen / ist der Kirchen beuohlen.

Das sie auch dagegen das wasser vnd eusserlich zeichen verachten / aus hoher weisheit vnd heiligkeit / ist ihres meisters des Teufels klugheit / der / als ein hoffertiger geist / vnd Gottes feind / die elenden menschen treibet / Gottes wort vnd ordnung zu spotten / Aber die Christen sollen wissen / das inn solchen eusserlichen zeichen / Gottes wort / befehl vnd ordnung ist / Darumb mus man die zeichen gebrauchen / vnd wircket Gott mit seiner ordnung / wie er verheissen hat / Derhalben spricht S. Paulus / das die Kirch durch die tauff gereiniget werde / Item / das wir durch die tauff wider geporn werden / welches alles darumb gered ist / das wir gewislich glauben sollen / das Gott mit den zeichen wircke

Das aber die Widerteuffer dagegen sagen / die kinder haben kein glauben / ist ein
D iij menschlicher

menschlicher gedanc / vnd ist nicht war /
Denn das ist gewis / das Gott inn den kin-
dern / nach ihrer mas wircket / so sie durch die
Tauff fur ihn bracht werden / Denn nie-
mand wird on Göttlich wirckung vnd wider-
gepurt selig / Johannis 3. Nu ist gewis das
die Kinder / so der Christenheit glider sind / sel-
lig werden / So volget / das war san mus / das
Gott inn ihnen wircket.

Der dritt grund / Die Kinder haben sün-
de an ihnen / nemlich / die Erbsünd / Derhal-
ben bedürffen sie vergebung der sünden / wel-
che ihnen durch die Tauff wird mit geteilet /
denn diese vergebung / vnd das eusserlich ampt
muß vnterscheid machen / zwischen den kin-
dern / welche selig werden / vnd den andern /
Aber hie kan man der Widerteußer geist recht
mercken / denn sie halten vnd leren / die kin-
der haben kein sünd an ihn / vnd das Erbsünd
nicht sünd sey / Item / das die angeborne bö-
se lust im menschen nicht sünde sey / Wenn
man ein lügen ferben wil / so bedarff man
viel mehr lügen darzu / Also hie / so die Wider-
teußer die Tauff wollen vmbstossen / ertich-
ten sie viel schrecklicher grewlicher lügen dar-
zu / Vnd bedencke ein ieder / der Widerteußer
heiligkeit / sie suchen newe eusserliche vnorden-
liche werck / damit wollen sie heylig sein / vnd
sind im hertzen so blind / das sie ihre eigen böse
lust nicht fur sünd halten / verachten Tauff
vnd

vnd eusserlich Gottes wort / vnd halten nicht
das man da Gott suchen sol / vñ das Gott mit
wircke / Darumb wissen sie nicht was glaub
ist / vñnd suchen frembde werck / oder wol-
len besondere erlenchtung haben / auffer / vnd
one Gottes wort / Das ist eitel blindheit / ir-
thumb vnd Teuffels gespenst / Vnd sind eben
die heiligen leute / danon Paulus spricht / das
sie toll sind / vnd prangen hoch daher / vñ rhü-
men ding / da sie nichts von wissen. Dieses
alles / sollen Christen wol betrachten / damit
sie die falchen geister vnd irwusch kennen
lernen / sie zu fliehen vnd zu meiden.

Das aber die Kinder Erbsünd mit sich
bringen / Vnd das angeborne böse lust sünd
sey / leret S. Paul gantz deutlich an vielen or-
ten / Roma. 5. Durch Adams vbertrettung /
sind wir alle sündig worden / Romanos 7.
nennet er die angeborne lust im menschen /
sünd / die inn vns wonet / vnd Roma. 8. spricht
er / Die lust im fleisch / ist has wider Gott / das
ist ja hart vnd deutlich gnug geredt / Item /
Ephe. 2. Wir sind geborn Kinder des zorns /
das ist sündig vnd verdampt.

Vnd inn Summa / es ist allezeit inn der
Christenheit dieser verstand blieben / das erb
sünd warhafftiglich sünd sey / vnd das diesel-
bige den Kindern durch die tauff vergeben wer-
de / vnd damit ichs hie nicht lange mach / denn
alle guthertzigen vnd verstendigen / Klar gnug
sehen

sehen / das die Widerteuffer Gottes were
gantz mutwilliglich hie verlaugnen / wil ich
noch nur ein vrsach setzen / daraus auch klar
zu vernemen / das an den kindern Sünd ist /
welche ihnen würd durch die tauff vergeben /
Denn alle Christen müssen bekennen / das
Christus nicht allein der alten / sondern auch
der kinder erlöser ist / So sie nu Christus be-
dürffen / als des erlösers / ist one zweivel sünd
an ihnen / Tieweil den gnugsam bewisen ist /
das sünd an den kinder ist / sollen sie verge-
bung erlangen / so mus das eüsserlich ampt
dazu kómen / sonst were kein vnterschied / vnd
keine kirch.

Der vierd grund / Tauff vnd beschnei-
dung / bedeuten beide / wie Paulus leret / gnad
vñ vergebung der sünden / Nu ist die beschnei-
dung der kinder recht / vnd nötig gewesen / vnd
sind dadurch die kinder Abrahe / von Gott
angenommen / vnd Gottes kinder worden /
Darumb müsse auch bey vns ein zeichen
sein / welches vnterschied machet / zwischen
Gottes kindern / vnd den verdampften.

Der fünffte grund / Der Herr Christus
hat gantz ein tröstlichen spruch gered von den
kindern / Des vaters wil ist nicht / das dieser
kinder eins verloren werde / Diese wort sind
von den beschnitten kindern gered / Also müs-
sen sie auch bey vns / von den ienigen kindern
allein vñstanden werden / welche glieder sind
der

der Kirchen / Denn sie können nicht von Hei-
den vnd Türcken verstanden werden / Die-
weil kein seligkeit auffer der Kirchen ist / das
ist / wo nicht Gottes wort vnd Sacrament
ist / Darumb sollen alle fromen Christen trost
vnd freud daran haben / das sie wissen / das
den ihre Kinder gewislich Gottes Kinder sind /
so sie durch die Tauff sind glieder der Kirchen
worden / vnd von Gott angenommen / Derwe-
gen ist ia die Kindertauff ein lieblicher hoher
trost / vnd das wir beschliffen / wenn alle
Widerteuffer / alle ire weisheit / heiligkeit vnd
marter zu samen bringen / so können sie den-
noch keinen menschen gewis machen / das
Kinder auffer der Kirchen / als Türckische Kin-
der / selig werden / Darumb ist ir lar eitel gantz
vngewis ding / vnd ertichter Teuffischer
betrug.

Wiewol wir aber aus Göttlicher schrift
guten beständigen grund angezeigt haben / so
wollen wir doch dieses auch erinnern / das die
Kinder tauff nicht ein new ding ist / sondern ist
auch inn der Altisten reinen Kirchen gewesen /
welche nicht zu verachten ist / Denn was zur
seligkeit not ist / das mus zuuer inn der Chri-
stenheit / vnd sonderlich die zeit / da die lar rei-
ner gewesen ist / auch bekant sein / So nu die
Kinder Tauff vnrecht / vnd die Widertauff
zur seligkeit not were / so mü ße solchs doch
etwa ein zeugnis vom heiligen geist inn der
Kirchen haben / Dieweil nu der Widerteuffer
Lahr

lahr gantz ein eigen newe gedicht ist / one ein-
ge Exempel oder zeugnis der alten heiligen
Kirchen / sollen billich vernunfftige Christen
ein schewe vor der Widertauff haben / Denn
es gilt nicht also schertzen / in der Christlichen
lahr on Gottes wort vnd einige bewerte Ex-
empel ein newe lahr einführen / ia wider Got-
tes wort / vnd wider alle Exempel / gantzer ge-
meiner Christenheit von anfang her. Das
ist grausam vermessenheit vnd künheit / da-
fur Gott vns gnediglich behüten wolle /
Denn es ist Teufflische verachtung Gottes /
vnd ist des Antichrist eigenschafft / wie Daniel
vnd Paulus sagen / Wie denn der Papsst vnd
die Mönich viel schrecklicher misbreuch / mit
gleicher künheit inn die Christenheit / on vnd
wider Gottes wort vnd alte Exempel / ein-
gefüret haben / als ire todten Mes / verbietung
der Ehe / vnd ander mehr stück / Vnd wiewol
die Widerteuffer vnter solchen stücken / auch
wollen die Kindertauff zelen / so iren sie doch
Denn die Kindertauff hat Gottes wort / vnd
der Eltesten reinen Kirchen Exempel / Denn
Christus spricht / Niemand kan eingehen inn
das himelreich / er werde denn widergeborn /
durch das wasser / vnd den heiligen geist / nu
ist dieses euss. rlich ampt / mit wasser teuffen /
der Kirchen benolhen / darumb sol die kirch
sollichs allen mitteilen / Darzu hat die Kinder-
tauff Exempel aus der Eltesten Christen-
heit. .

Denn

Denn Origenes spricht mit klaren worten
im seiner auslegung / Romanos 5. Das
die Christenheit verhalten die ordnung von
den Aposteln empfangen habe / die Kinder zu
tauffen / dieweil angeboren sünd an Kindern ist /
welche durch das wasser / vnd den heiligen
geist abgewaschen werde.

So schreibet Cyprianus zu Fido / ein
guten vnterricht / das die kirch nicht sol die
kinder von der tauff vnd gnaden ausschlies-
sen / sondern sey schuldig inen die tauff mitzu-
teilen / Denn so viel an ihr ist / ist sie schuldig /
allen menschen iung vnd alt / ir ampt mitzutei-
len / Vnd saget dabey deutlich / das die Kinder
verhalten der tauff bedürffen / das sie durch
Gottes gnad vnd werck inn der tauff erlan-
gen vergebung der Erbsünd. Dergleichen
sind viel spruch inn Augustino / welcher auch
saget / das diese ordnung inn der gantzen kir-
chen gehalten werde / als sey sie von den Apo-
steln herkommen.

Diese spruch haben wir erzelet / damit
die einfeltigen sich nicht betriegen lassenn /
durch etliche lügenhafftige geist / welche den
vngelarten einbilden / als solten die alten heili-
gen / die kindertauff nicht gehalten haben /
wie denn etliche zu Münster geschrieben ha-
ben / dazu / das man bedenck / das inn der
Christlichen kirchen / wider solche alte Exem-
pel / newe lere one Gottes wort einführen / gros-

L ij se ver-

se vermessnheit / frecheit / vnd dazu irthumb
ist.

Wer diese erzelte vrsachen vleissig vnd
wol betracht / der kan durch Gottes gnad /
seinen glauben wol stercken / vnd sich für dem
vnchristlichen irthumb der Widerteuffer /
wol bewaren / Denn wir sollen ia wissen / das
der glaube anfechtung leiden wird / vnd sol
durch Gottes wort gestercket werde / Darumb
sollen wir wacker vnd vorsichtig sein / das vns
der Teuffel nicht von Gottes wort für / auff
eigne gedancken / wie den Widerteuffern ge-
schihet / Den das ist der grund vnd anfang
der verführung inn den Widerteuffern / das sie
Gottes wort verachten / vnd fallen auff eigen
gedancken / vnd haben solch gros wolgefal-
len vnd lust an den selbigen / das sie fürgeben /
es sey der heilig geist / vnd faren denn fort vnd
lestern Gott / sagen / man sol das eusserlich
wort vnd schrift nicht achten / sondern man
sol dem geist folgen / Wenn dieser eingang
vnd diese thür offen ist / das ein ieder nach sei-
nem geist / vnd nicht nach Gottes wort rich-
ten sol / ach Gott / wilch grenlich ding wird
folgen / wie denn das Exempel zu Münster
bewiesen hat / So haben vnser vie' von den
itzt gestrafften Widerteuffern gehört / wenn
sie mit klarer schrift vberwunden warenn /
sagten sie entlich / der Geist leret sie also.

Der halben ist hoch von nöten / das
man

man drauff achtung habe / das wir vns nicht
von Gottes wort zu ungen gedancken abfüren
lassen / sondern wissenn / das der heilig geist
nicht one Gottes wort wircket / sondern durch
Gottes wort / vnd das man Gott bey seinem
wort erkennen vnd fassen sol vnd mus / wie
Paulus spricht / Der glaube kömpt aus dem
gehör / das ist / aus der predig / oder aus dem
eusserlichen wort / Diese ordnung helt Gott /
vnd zerreist sie nicht / darumb ist verachtung
des eusserlichen worts / vnd der schrift / eitel
Gottes lesterung / welche auch die weltliche
Oberkeit / zu straffen schuldig ist / laut des an
dern gebots / darinn befohlen ist / das man
Gottslesterung straffen sol / Dazu sibet man /
was inn eusserlichem leben für schand vnd
laster folgen würde / so ein ieder nach seinen ge
dancken leren vnd leben wolt / Darumb der
weise König Salomon spricht / wenn die
rechte predig weg ist / so wird das volck vnd
Regiment zustrawet / Derhalben sol die welt
liche Oberkeit auch hie wachen / vnd diese
Gottes lesterung nicht dulden / nemlich / offent
liche verachtung der schrift vnd des eusserli
chen worts / sondern mit ernst weren vnd straf
fen / vnd sonderlich sollen alle Christen / solche
verachtung der schrift / gewislich für Teuff
lich halten / vñ wissen / das es eben der schlan
gen rede im Paradis ist zu Eua.

Es haben auch die Widerteuffter mehr
irthumb

Irthumb von beiden Sacramenten / vnd von
irem brauch / dazu von andern mehr artikeln
dauon andere zuvor auch geschrieben / vnd ie-
tzund alle zu handeln / die zeit nicht leidet / Vñ
ist dieser vaterriecht furnemlich darumb gestel-
let / das die einfeltigen / dadurch an etlichen
leichten artikeln / wolten den geist inn den Wi-
derteuffern / richten vnd kennen lernen / vñ sich
deste mehr wissen zu hüten / Bitten derhalben
die Christlichen Prediger / wollen diese vnd
andere artikel weiter erkieren / vnd die leut offte
vnd mit vleis inn solchen fahrlichen zeiten vn-
terrichten / wie sie schuldig sind / vñ Gott müs-
sen rechenschafft geben / so sie diesen irrthumb
ben nicht mit ernst widerstand thun.

Es haben auch die Widerteuffer etli-
che geberde / damit sie mehr die leut bewegen
denn mit der lar / nemlich / das sie viel prechti-
ger vnd frembder wort gebrauchen / vnd rhü-
men hohe erleuchtungen / welches doch als
les erlogen ist / wie die erfahrung offte bewisen
hat / Item / das sie grosse demut furgeben /
bey den icnigen / welche sie loben / Item / das
grosse brüderliche trewe scheint / das sie ihre
güter inn gemein geben / Item / das sie inn lei-
den grosse gedult erzeigen / vnd mit grosser kün-
heit vnd trotz inn todt gehen / Nu ist nicht
wunder / das solche geberde iemand bewegen
Aber ein Christ sol Gottes wort / hoch vnd
weit vber allen schein inn eusserlichen geber-
den /

den heben vnd setzen / vnd sol wissen / das man
geistliche sach nach Gottes wort / vnd nicht
anders richten sol / Können doch die Leiden
auch freuenlich vnd freiditlich inn tod lauffen
/ Denn der Teuffel kan wol die seinen ver-
blinden / das sie ihre sünd vnd straff nicht fü-
len / Christen fülen sünd vnd angst / vnd vber-
winden sie mit glauben / darumb / die weil sie
streiten / scheint schwachheit an ihnen / Der-
halben / ob gleich die Widerteuffer trotzlich
inn tod lauffen / sollen wir darumb nicht von
Gottes wort abfallen / sondern bedencen /
das rechten glauben im hertzen zu erhalten /
auch ein ernst vnd kampff wider allerley er-
gernis dazu gehört. Unser Herr Christus
wolle vns gnediglich bewaren / vor allen
irthumb / vnd inn rechtem glau-
ben / vnd rechtem gehor-
sam erhalten /
Amen.

Gedruckt inn der
Churfürstlichen Stadt
Zwickaw / durch
Wolfgang Meyers
pcc̄t. . .

✻

Fig. 152




40



X 2207037







B.I.G.

Farbkarte #13

27. 10

Verlegung etlicher vnchristlicher Artikel

Vg
932

III, 781

Welche die Widerteuffer furgeben.



M. D. XXXVI

BIBLIOTHECA
PONICKAVIANA

UNIVERSITÄTS-BIBLIOTHEK
HALLE
(SALE)